

Leger, mirar, surrir e smarvegliar

Cun pliras occurrenzas ha la Fundaziun Pro Laax commemorau onn vargau il centenari dil caricaturist Hans Moser (1922–2012). Sils 13 da fevrer 2023, siu 101avel, cumpara ussa in cudisch pulpiu da bunamein 400 paginas. Duront las retschercas ha gl'editur Remo Arpagaus fatg numerusas scuvierias.

AUGUSTIN BEELI/FMR

«Laura Barbara Moser-Müller han ins satrau ils 21 da zercladur 1932 sil Lutheran Cemetery, oz igl «All Faiths Cemetery» el Middle Village a Queens/New York. Siu crap-fossa ei aunc adina leu», san ins leger ell'annotaziun sin pagina 365. Igl ei il capitel culla biografia da Hans Moser. Quella informescha dallas staziuns da veta dil renomau caricaturist. A Laax eis el vegniun 1966 cun sia dunna danesa Sonya. Daco ch'el ei in-summa vegniun gest en quei vitg sa *Remo Arpagaus* exact. Gl'onn 1954 aveva el pas-sentau l'emprema gada vacanze a Fidaz. Leu menava sia onda, Céline Baiter-Moser, ensemen cul consort Max, il hotel Kurhaus. Aschia ein Hans e Sonya Moser-Ytteborg vegni dalla Dani-marca e secasai 1963 a Fidaz. «Els devan tennis cun in pèr che habitava gest dasperas. Quels havevan getg ch'els hagian cumprau terren a Laax e baghegien casa leu. Sco quei ch'els han raquintau, temevien els memia fetg il Crap da Flem davos il dies. Cun agid dall'onda Selina han els sin quei cumprau la parcella cunfinon-ta che era venala», raquenta Remo Arpagaus. Il prezi da 15 francs il meter era pli modests che oz. Tenor sias retschercas ei quei stau il november 1965.

Reconstrui la biografia

Da quei temps collaborava Hans Moser gia stregamein culla revista satirica Nebelspalter. Gl'onn 1953 aveva el entschiet a dessignar per quella e cuntinuau quei tochen 2004.



Il frontispèzi da «Was soll es denn da noch zu lachen geben?! – Hans Moser 1922–2012». Il cudisch culla numra ISBN 978-3-03919-584-8 san ins retrer en tuttas librerias.

Varga 50 onns ha el s'udiu tier la squadra stretga. Cun sias figuras, oravontut cul «Herr Schüüch», ha Moser dau character al Nebelspalter e contribuüu che la revista jamnala ei daventada in organ publicistic da cult en Svizra.

El cudisch niev san ins admirar ils frontispèzis che Hans Moser ha creau pil Nebelspalter. «En tut eis ei 80», declara Remo Arpagaus.

Vitier ha el fatg 29 frontispèzis per l'autra revista, il «Schweizer Spiegel» che ha existiu da 1925 tochen 1972.

Igl ei in deletg da sfegliar e da surrir atras quei cudisch. Era sche Hans Moser sedeclarava sco pessimist eis ei illustraziuns atras atras divertentas. Il caricaturist metteva discretemein il det ella plaga. Il progress, seigi en Svizra ni en sia nova patria pli stretga, ha pretendiu unfrendas.

La grafichera *Theres Jörger*, carschida si a Laax e sesenta a Sagogn, ha collaborau stregamein cugl editur. Da cuminonza

han els produciu il cudisch. «Igl ei ina fontauna d'inspiraziun», manegia Remo Arpagaus. Enten retschercar las datas dalla famiglia da Hans Moser ha el fatg scuvierias. «La reconstruziun dalla biografia ei semussada sco lavur difficultusa, denton fetg biala», tradescha gl'editur alla FMR. El ha saviu confirmar e curreger datas, loghens, persunas e fatgs che eran nuncars. Aschia, per exempel, ha gl'editur anflau a New York la fossa dalla mumma da Hans Moser. Ins sa leger che la sora, Selina Laura, numnada Lori, ei morta 1981 e ch'il frar Hans ha schau satrar l'urna sil santeri da Sogn Martin a Glion.

In cudisch sco in compass

In detagl niev ei era che Hans Moser ei naschiu a Turig e buc el cantun Schaffusa. Il bab Johann Arthur luvrava a Dübendorf sco mecanist d'eroplans. Cu el ha piars la piazza leu eis el sedecidiu 1927 – sco numerus auters – d'encurir il cletg ell'America. In onn pli tard ha sia dunna, ina oriunda Romontscha, culs dus affons dad ort e sis onns, fatg il viadi vi sur mar. La veta da Moser ei sco in roman. Adina puspei fruntan ins silla construziun: «Auch da hatte ich Glück.» El ha fatg bia per siu cletg, el, che ha adina admoniu.


Sia ovra artistica ha Hans Moser testamentau alla Fundaziun Pro Laax. «Enten realisar il

project dil cudisch havein nus constatau ualti spert che si'ovra ei per in bionton pli voluminusa ch'il material archivau», scriva Remo Arpagaus ella prefaziun. Ei seigi stau nunpusseivel d'includer tuts dessegns e columnas, lavurs per reclamas ed illustraziuns digl artist. «Il cudisch dueigi esser ina specia da compass per tut quels che vulan survegnir ina survesta sperta da Hans Moser, ni che vulan s'approfundir pli detagliu en sia ovra», gi gl'editur.

Collaboraziun cun «Hier & Jetzt»

Da 1966 tochen sia mort ha Hans Moser observau il svilup economic a Laax. Il vitg da purs ei setransformaus ad in resort turistic cun boom da baghegiar ed effects secundars. «El arveva la finiastra ed anflava lavur», descriva Remo Arpagaus ina dallas fontaunas che han inspirau il caricaturist. Il cudisch ei lu era titulau «Was soll es denn da noch zu lachen geben?!». Rir e bargir, il humor ner, quei ha adina s'udiu tiel legher pessimist Hans Moser.

Il cudisch ha la Fundaziun Pro Laax ediu da cuminonza culla casa editura Hier & Jetzt da Baden. Quella ei sespecialisada sin tematicas da cultura e historia. Remo Arpagaus ha concepiu, elaborau e redigiü il differentes capetels. Denter auter ha el cumpigliu in text ch'il scribent Jürg Federspiel ha scret da Hans Moser. En in auter capitel vegn Regula Schmid, descendenta digl editur dil Nebelspalter, a plaüd. Ulteriurs texts ellas differentas parts ein




dad *Erwin Ardüser*, *Yvonne Gienal* e *Susi Klausner*. Gl'editur ha cumpigliu el cudisch era ina regurdientscha che Hans Moser ha scret dil temps ch'el ei staus schuldau american duront la 2. Uiar mundiala. Igl ei in text ton dramatic sco sarcastic.

Dumengia proxima, ils 12 da fever 2023, presenta la Fundaziun Pro Laax il cudisch «Was soll es denn da noch zu lachen geben?! – Hans Moser 1922–2012». L'occurrenza cun referat ei allas 17.00 ell'aula dalla casa da scola a Laax.



Talas caricaturas han dau character al Nebelspalter. Tier quella dretg enconusch'ins il vitg da Laax.



FOTOS MAD/HANS MOSER

FLEM

Accident pervia d'in pedunz

Margis suentermiezgi ei schabegiau in accident a Flem Staderas. In automobilist che carrava en direziun Laax ha stuiu untgir in pedunz sin via ed ei collidau culla seiv directiva. Quei scriva la Polizia cantunala. Allas 14.45 carrava gl'automobilist da 28 onns cun siu vehichel dalla via locala da Flem per entrar sil stradun digl Alpsu. Sut la punt dil stradun H19 ha el stuiu untgir anetgamein il pedunz che mava enamiez la via, medemamein en direziun Laax. Tras il manever ei gl'auto collidau culla seiv directiva dalla vart dretga. In automobilist che suandava ei sefermaus ed ha discurreiu cul pedunz. Silsuenter ha lez bandunau il liug ed ei ius anavos en direziun Flem e gl'automobilist nunenconuschent ei carrau vinavon en direziun Laax. Gl'automobilist cugl accident ei restaus anavos persuls. La Polizia cantunala enquera ussa il pedunz e gl'automobilist nunenconuschent. (cdm/fmr)

SEDRUN



Ann Nielsen & Tumasch è concerteschon venderdis, ils 10 da fevrer 2023 a Sedrun.

FOTO MAD

Concert d'Ann Nielsen & Tumasch è

Venderdis, ils 10 da fevrer 2023 a partir dallas 20.00 concerteschon *Ann Nielsen & Tumasch* è ella Sala Cristalla a Sedrun. Il concert vegn organisau el rom da Tujetsch viva cultura e l'entrada ei libra. Ann Nielsen e Tumasch è presentan lur ovras actualas, en sets individuals e communabels. Gia dapi varga 30 onns cumponan e contan omisdus artists e gleiti ina mesa decada fan ei quei comunablamain. Ann Nielsen ei ina Danesa alpina, che conta cun vusch ferm-clara dallas cuntradiziuns dultschamaras dalla veta. Quei fa ella en engles e danes. Sco Ann Nielsen e Tumasch è declaran sin damonda dalla FMR, ein las canzuns dad Ann sorprendentas e muentontas. «Floodflower» ei il tetel digl emprem album dad Ann Nielsen. Tumasch è ei in Romontsch mexican, melanconic euforic. El ei in cantatur ludic ed experimental, multilingual ed eclectic, sensibel ed inebriant. (fmr/sr)

FLOND

Convivenza – tiarza serada culturala

Lumnezia, Val S. Pieder e Sursaiisa Mundaun: quei ei treis regiuns en ina regiun. Cun atgnadads da pievel e cultura, denton medemas sfidas economicas. Il project «Convivenza» emprova da scuvierer las vias comunablas. Ina impurtanta leutier eis ei da rimnar la populaziun e da discutir dallas sfidas, schanzas e temas. Leutier ha ei dau gl'onn vargau duas sentupadas. Ina ei stada a Val S. Pieder, l'autra a Cuschnaus/Lumnezia. Sonda proxima ei la tiarza, e lezza ei a Flond. Sin territori dalla vischnaunza Sursaiisa Mundaun ei la proxima sentupada culturala cul tetel «Convivenza – Zusammenleben». A caschun da quella sepresentan musicistas ed artists, cantaduras e cantadurs da tuttas treis vischnauncas. Ella halla plurivalenta a Flond sepresentan bands, cantaturas e cantauturs, gruppas e chors sco Canorus Lumnezia, Alexi & Marcus, la Valimusic da Val S. Pieder, ils Fiddling Millers, *Leander Albin* da Tersnaus sco era il chor da project da dunnas dalla Lumnezia. In accent dat in ensemble communabel «Akzent Vals & Canorus Lumnezia». (fmr/abc)

La sentupada «Convivenza – Zusammenleben» a Flond ei sonda proxima, ils 11-2-2023, allas 20.00, en halla plurivalenta a Flond. In e scadin ei beinvegnius.

FESTIVAL DA STAD

Il Line-up digl Open Air Lumnezia ei cumplets

Il comitè d'organisaziun digl Open Air Lumnezia ha publicau il program cun las bands dall'ediziun 2023 sin la homepage. Per la gievgia ei vegniun engaschau las suandontas bands: *Breitbild*, *Stefanie Heinzmann*, *Sam Himsel*, Ladunna, 2K mafia ed Unsh. Il venderdis vegnan *Robin Schulz*, Royal Blood, Beatsteaks, Monet 192, *Annie Taylor*, Tashan e Kids in the cage sin tribuna. Ils acts da la sonda ein: Fanta 4, Franz Ferdinand, Itchy, *Joya Marleen*, Nativ, Andryy e Nesta and the Blondes. Il 37avel Open Air ha liug dil 20 tochen ils 22 da fenadur 2023 a Degen. (rtr/fmr)